

四庫全書

子部

欽定四庫全書

子部

江南經畧卷二上

詳校官中書臣丁榮祚

編修臣倉聖脈覆勘

總校官進士臣朱鈐


校對官助教臣羅萬選

謄錄監生臣倪景寬

欽定四庫全書

江南經畧卷二上

蘇州府屬縣疆界參錯圖



明 鄭若曾 撰

蘇州府屬縣疆界參錯圖


東

寶山

二卷上一

上海縣界

斜角



匕

月

界興嘉南

錄定四庫全書

江南經畧



蘇州府總論

蘇州乃南都之裋袴也人文財賦甲於天下姦雄素欲  
染指萬一世變計賊入境有三策焉一曰毘陵二曰太  
湖三曰武林何言乎毘陵也從古論江南咽喉者皆曰  
京口不知夾岡險隘易於堵截賊豈敢由此而東其勢  
必據鎮江遣舟師從河莊閘進五十五里至犇牛又三  
十五里至毘陵頗為便易既至毘陵則丹陽金壇皆可  
傳檄而定而無錫以東咸入其彀中矣此蘇州北境之

患也何言乎太湖也賊由蕪湖溧陽宜興下太湖片帆  
可至胥口此蘇州西境之患也何言乎武林也賊由采  
石徽歙富陽蠶食而至武林不覺其進而災害漸逼此  
蘇州南境之患也北境者頭顱也乃正兵也賊以下駟  
致吾上駟羈縻歲月相持而無取決而以太湖之兵衝  
吾右脇武林之兵擊吾後尾此之謂奇兵也苟非識其  
機而預防之蘇其能保乎此備中原巨寇之大旨也若  
夫倭寇之來必由吳淞劉河白茆福山諸港口而入當

嚴江防海防遏之於初至之時勿容登泊策之上也萬  
一內侵堅壁清野俾進不得攻退無所掠饑疲而去則  
追而擒之策之中也此寇志在擄掠如虎狼逐食用計  
窵之而已矣非奪據城邑者之比也論吳防者不可以  
不辨

蘇州府疆界考

蘇州禹貢揚州之域天文斗分野周泰伯仲雍始居之  
地武王封仲雍曾孫於此為吳國在春秋時闔閭城姑



蘇而吳國之境東至甬東西至雩婁豫章南至於越艾  
北至徐鍾吾橐臯戰國屬越後屬楚秦曰會稽郡領縣  
二十有六而吳婁二縣全有今之郡地幅幘甚為遼廓  
至東漢陽羨令周嘉上書以吳越二國周旋萬有餘里  
始分會稽吳郡分浙江以西為吳郡領縣十三孫吳因之晉分吳縣地  
置海虞梁改婁為崑山以海虞南沙為常熟陳後主禎  
明元年改郡曰吳州隋開皇間改為蘓州移治橫山大  
業元年復改吳州三年仍曰吳郡領縣五則烏程長城

來屬焉唐武德四年改為蘇州萬歲通天元年分吳縣置長洲領縣六天寶元年又改吳郡至德二年復為蘇州大歷十三年改曰雄州領縣七則并有海鹽華亭嘉興而烏程長城又分屬矣建中元年仍改蘇州後梁曰中吳府後唐曰中吳軍宋太祖開寶元年復曰蘇州領縣五為吳長洲崑山常熟吳江而海鹽嘉興移屬嘉興府華亭移屬秀州即今之松江也神宗熙寧七年改平江軍徽宗政和五年陞府寧宗嘉定十年分崑山東境

置嘉定縣元至元十三年改平江路張士誠入據改隆

平府尋復為平江路國朝吳元年改為蘇州府洪武八

年以揚州府崇明縣來屬弘治十年分崑山縣惠安新

安湖川三鄉常熟縣雙鳳鄉嘉定縣樂智

即崑山縣  
醋塘鄉

循

義

即崑山縣  
平樂鄉

二鄉立太倉州共領州一

太倉縣七

吳縣長  
洲崑山

常熟吳江  
嘉定崇明

東西五百四里南北四百二里東至崇明縣三百十

四里西至常州府宜興縣界一百里南至嘉興府嘉

興縣界九十四里北至揚州府通州界一百五十里  
東南至松江府華亭縣界一百二十六里東北盡常  
熟縣界許浦港一百七十二里西南盡吳江縣界一  
百五十一里西北至常州府無錫縣界四十九里

蘇州府城池考

自秦伯築城梅里在無錫縣境厥後諸樊南徙吳地周  
敬王六年闔閭有國伍子胥創築大城周四十二里三  
十步小城周十里為門八東曰婁

吳地記別作膠

曰匠

又名干將今廢

婁封之間尚  
有匠門塘

西曰閭

一名象天  
又名破楚

曰胥

一名姑胥

南曰盤

一名蟠

曰蛇

今廢

北曰齊

一名望齊

曰平

一名巫今廢  
遺有平門塘

歷代皆仍其舊

至隋楊素徙城橫山東唐武德九年復還舊城乾符三年刺史張搏重築之梁龍德二年始以甃甃高二丈四尺厚二丈五尺裏外有濠宋初門已塞二惟存閭胥盤

封

封門一名鱗鮮門宋時常堙塞范仲淹守郡闢之

婁齊六門後胥門亦廢至

開禧間隕圮殆半嘉定間知府趙汝述沈皞相繼修治堅完為最寶祐二年趙汝歷增置女牆補建封婁齊三

門樓元人下江南凡城池悉命湮毀雖設五門蕩無防蔽至正十一年兵起復詔天下繕完城郭總管高履築

壘開濠復闢胥門

詳見儒學提舉鄭元祐平江路新築郡城記

閭盤封婁齊

各有水門惟胥無水門張士誠入據增置月城國朝平吳更加修築城為亞字形地瀕江海制防宜密司封疆之寄者務加意焉可也

城

週圍一萬二千二百九十三步九分凡四十五里

吳縣二十二里長  
洲縣二十三里  
高二丈四尺厚一丈八尺

池

深一丈一尺濶九丈五尺

門

陸門六東北曰婁門東南曰葑門西北曰閭門西  
南曰胥門南曰盤門北曰齊門每門各有月城各  
建鼓樓各設弔橋惟水關止於婁葑閭盤齊五座  
而胥門不設

敵臺

五十七座

窩舖

舊一百九十二座新造跨街者一百六十一座

雉堞

舊九千七百九十個今加以新造敵臺共一萬八  
百有零

蘇州府守城官兵考



蘇州衛指揮使司

太祖吳元年以所俘張士誠兵建衛命指揮使吳良掌之隸中軍都督府

署在府城內飲馬橋西即宋府倉基元淮南行中書省軍器局在衛治內西教場在北城下報恩寺後

指揮使三員

內掌印一員

同知六員

僉事十二員

鎮撫司鎮撫二員

經歷司經歷一員

領所五

洪武

二十六年定每千戶所統軍一千一百二十名百戶所統軍一百十二名

左千戶所營在封門內右千戶所營在閭門內

中千戶所營在盤脊二門內前千戶所營在婁

齊二門內後千戶所分立為嘉興守禦千戶所

千戶十員 百戶五十員

每百戶所設總旗二名小旗十名

共統軍士五千六百名

元韶按吳城舊矣官兵員額可考而知也近境多盜豈外寧必有內憂耶伯魯列城池附軍制使居

是邦者各知所稽云

按察司僉事  
鄭元韶識

### 守城輿論

本府城池濶大廣遠攻圍固難守禦亦難且居民太繁蓄積在外事體與他郡不同客歲島寇薄城謹採輿人之言條上郡守採擇施行者也詳錄以備後事之防

### 分信地

一六門城樓各派定府佐一員專督該門守城夫役府佐不足以所屬州縣佐內科目出身謫官

金史卷之二十一  
卷二上  
之才能者充之

一城中必須本府與長吳二縣掌印官住劄玄妙  
觀一以居重馭輕一以接應各門事宜一以近  
憲院謀議一以便士友叅謀用把總指揮一員  
統兵六百名屯處其中作中軍名色

府主上城縣尹本不宜同事但係一邑之主  
諸事藉以奉行故須同處

一府有府庫縣有縣庫獄囚皆須防守府中須用

首領官一員縣中須用佐貳官一員委令看守  
一各城門須另設府首領或縣佐貳有才官一員  
典守城上一應器用隨時給發

一宜分屯守城池之官兵於六門附近寺觀無寺  
觀者近門公廡屯劄

一請鄉宦分守各城門

各就其家近便與情之相合者分配

分職掌

一設法大戶米穀進城

右一項須長吳二縣掌印官專督之

一設法守城物料進城

稻草

石灰

磚石

鉛鐵

火藥

油燭

右六項須府佐一員專督之

一設法竹木遠去與進城

右一項須府佐一員專督之

一查修城屋城門閘板置造城堞燈架燈籠

燈架  
燈籠

俱當照崑

山縣式

右一項須府佐一員專督之

一製器械

銅發鑛

佛狼機

鳥嘴銃

鉛錫銃

火毬

火箭

噴筒

煙罐

箭匠

竹匠

木匠

造火器  
架子用

銅匠

鐵匠

合火藥人

右火器府佐一員專督之

長鎗

刀

月斧

鐵盔

鐵甲

皮挨牌

紙甲

弩

弓箭

太倉州取  
弓匠來造

鐵匠

皮匠

竹匠

木匠

裁縫

弓箭手

右兵器府佐一員專督之

已上火器兵器先揀選舊時所蓄可者用之

不可者作急製之某人某人長於揀選者也



某人某人長於製造者也與府佐相協贊庶  
不為各匠所欺

廣儲蓄

一區處米穀入城

賊寇深入因糧於我無他轉運我能堅壁清野  
則寇失其望勢難久居乘其敝而擊之易如拉  
朽矣通計長吳二縣諸大家倉廩與客販囤園  
棧房陳陳相因不啻百萬以其便於水次俱在

城外莫肯內遷懼賊焚燬設牛酒錙幣開門延  
待以圖倖免者吳人之恒態也城中人衆食少  
城外賊反足食豈可哉宜令長吳二縣正官先  
行嚴訪附郭堆積實數及各鄉鎮大戶積米在  
家待價者查審的實密請憲院差風力進士官  
協同衛官一面星夜分封撫按封皮  
各一張一面集其  
管米之人到官著落各該地方刻期催運入城  
任民堆積開糶其時價高下官府並不得參與

運米進城者除鄉中自有船外園園棧房僱船甚難官為督令埠頭備集船隻斷定每百石船價銀若干各限地方某處米穀從某城門入六門分入免致壅塞脚夫挑運者官亦定其遠近之價庶米主所費有限不苦轉輸而操舟荷擔之夫亦各得其所矣各鄉糧塘里長期定幾日開報已經搬運入城者幾家府縣官親行勘驗若恃頑不遷留資盜糧者治以養寇之罪糧塘

里長回護親故之家扶同欺蔽混開已運入城者許貧民舉首米主與糧塘里長俱以軍法處治仍給賞首人十分之三其七分沒入官充養守城兵夫之用若勢宦之家須撫按官大振風裁一體叅究雖同年故舊不少假貸如是著實舉行則寇進不得攻城退不得野掠終身創艾不敢深入矣此攘寇安邦之一義也若但虛文告誡不行賞罰或賞罰而不能行於勢家吁城

其危乎何守禦之足云

一區處鉛鐵入城

鉛鐵資火器之用關係非輕不可棄以資敵蘇  
城客販冶坊俱在城外須先查各舖行及冶坊  
等姓名賊有警報著本地方總甲押催依期搬  
運鉛鐵鐵鍋鐵器入城任從貯專督官再行  
逐一查訪不運入城者本家律以與賊交通之  
罪總甲不行開報一體究治鉛鐵等入官公用

一區處火藥入城

蘇州硝黃之類進城有限務先查定各南貨鋪行賊有警報著本地方總甲押催依期搬運入城任從堆置如有公用悉照時價將銀現買專督官查訪不運入城者治以私販火器與賊交通之罪總甲不行開報一體坐罪

一區處磚石入城

城夫不閑武藝須用磚石擊賊賊警急時城門

已設盤詰矣軍民人等每入各城門須令各帶  
磚石一塊置於月城內空地守城軍搬運上城  
每五十垛作一磊以石灰封識聽用如不帶磚  
石者盤詰人員不許放入本府仍諭令湖船裝  
載西山石片交與把門人員運貯城上助用如  
不移運上城作磊罪加把門員役

一區處石灰入城

守城之具甚多急用惟灰瓶石塊為便必須預

備然灰瓶毒藥修砌等項俱資石灰須預仰各  
密戶領價依期送運石灰入城封識沿城寺院  
以備臨時取用

一區處稻草入城

城上燒賊必資稻草須先期派價與各糧塘里  
長領買若干萬束不拘蘆柴稻柴茅柴堆貯空  
閒房屋以須急用

一區處城外竹木



竹木行俱在附郭若不遷徙皆賊攻城之具也  
須仰各商將竹木行依期輪運入城開賣其在  
水各排令移去五六十里外隱僻港中暫置以  
待賊退復還故處如不行遷徙俱取入官公用  
一區處油燭入城

賊臨城下缺乏油燭必無處置須查各城門外  
一應油行燭行及出販舖家仰該地方總甲於  
有警之日押民依期搬運菜油豆油柏油桐油

白蠟牛燭等項入城聽從開舖交易如有公用  
悉照時價將銀現買如不依期搬運入城專督  
官挨查連地方總甲一體問罪其物入官

一守城器用

城上燈籠每五垛口止用一盞燈用新紙油者  
方明亮燈上用一油紙蓋以防雨

或用席  
帽更妙

蓋上

仍壓以一小瓦片以防風每燈置燈架將竹竿  
五尺用繩繫之竹竿平出城垛外竿頭用鐵圈

懸燈於下離地數尺俾賊手取不及為準庶使賊抵城下我能照見我瞭堞口賊不見我所給之燭五人輪管換燭即輪更之人不得誤事通計城堞一萬零八百該設燈架二千一百六十副每副價銀五分共該銀一百零八兩須預令長吳二縣官設法處造勿累保長等人

蠟燭每燈架一夜給與十枝每夜該燭二萬一千六百枝連六門城樓用共約二萬二千枝以

一月計之該燭六十六萬枝通計銀九百六十兩須令長吳二縣支公帑分備勿累保長及支更兵夫自備恐曠日持久所費不給未免誤事且係夜巡重計不當靳小費可也

鐵鍋四百隻臨時與冶坊借之事已即行給還行竈四百隻每隻價銀二分該銀八兩令長吳二縣每縣出銀四兩置辦

水缸水桶最宜多備一以供炊爨一以備火攻

通計應設水缸八百隻每隻價銀三分水桶八百隻每隻價銀二分共該銀四十兩宜以三四徒罪贖銀辦之

酒瓶三萬個每十個價銀一分該銀三十兩亦以贖罪銀辦之

蓑衣箬笠一萬一千副每副價銀三分該銀三百三十兩宜令長吳二縣支公帑置辦勿累城夫自備

草鞮二千七百五十條連預備三千條該銀一十五兩大樣蘆席一萬一千領每領價銀一分該銀一百一十兩須將贓罰銀給各區糧里長辦之

竹木罰臨時不搬竹木行者用之

其餘應用物料俱令長吳二縣動支公帑先行預貯寺觀公廨去處委官封識有事隨令本官給發

嚴禁約

一城中出入如有異言異服面貌可疑之人司巡視員役同把守各門者務令嚴加察覈勿致疎虞以貽後日之悔

一飭諭寺觀菴院不得招留遊方僧道如故縱察出治罪若飯店投宿倘有來歷不明者亦當詳察知會保甲長勿得隱蔽貽地方之累查出同

罪

一各處娼優之家乃盜賊之巢窟宜令長吳二縣將城內城外樂戶水戶多者每十家少者五六家中擇其能事者一人定為頭領每日稽查某家接留若有蹤跡可疑之人許頭領并接留之家報同地方保甲人等拏送到官追究如勢不能擒密報所在官司督發兵快捉拏有功一體重賞若互相容隱事發頭領并接留之家地方保甲一體同罪



一變起不測有等游手之徒專以虛張聲勢煽惑人心受其害者不淺今後遇有成羣結黨謠言鼓衆者須令所在官司即時擒拏以激變軍情之罪治之

一小民無事安居貿易有事罷市失業民不堪命為人上者尚得混擾於其間乎諸凡守城應用物件除令長吳二縣動支公帑分備外其餘公用之物俱宜現給官價不可分毫派及民間倘

有不法吏胥借端需索因事擾民者須立刻重懲之

慎防禦

一某指揮見練兵千餘名已有武舉三員統領若賊寇臨城某指揮帶兵六百名屯處玄妙觀中護衛以為中軍復以原統兵武舉一員統兵二百名屯處府前防守庫藏并司獄司獄囚再用武舉二員各統兵一百名屯處長吳二縣縣前

防守二縣庫藏獄囚若賊未臨城之日上司有調遣之事先分若干應命賊入腹裏即收其兵入城原如前法處置名曰聽調之兵

一官生中宜選用六員俟警報到即令會議各人平日所知精兵召募一千二百名團聚北寺中以團練府佐一員專督之官生六員參謀其中合聚訓練務期可戰可守以須實用待賊臨城每門分遣原練兵官生一員各帶兵二百名屯

處於附近城門寺觀中一處有變隨以本處兵應之別處不得妄動若賊寇攻城危急應該用兵攻擊應援亦待中軍方畧已定有信牌發遣然後行動名曰實用之兵

一城中須先計道里適均定作十二處派定地方某處起某處止分遣省祭雜色等官一十二員每一員率領火夫五十名屯處所分地方菴院寺觀中給與水桶水斗撓鈎等項以防一方火

患假如某方火起止許信地火夫救護撲滅城上人夫不得亂動城中居民亦不得喧嚷奔走擾亂地方就使本家失火亦不得離次仍給虎頭火牌一面上書專委救火與禁緝擾亂地方等字樣以專委任亦便夜間救火執照以開巷門其火夫著各該圖舉報極貧人戶每名日給米二升自贍若地方火夫救援不力致有延蔓及不係信地火夫乘機搶火者處以軍法

共計火夫六百名每日該給工食米一十二石通計一個月不過用米三百六十石若此法一行名雖救火實則處置貧民得所

一凡遇警報緊急城中居民近城者不宜堆積稻草蘆葦恐防火箭飛入在內柴堆亦易發火俱宜禁諭少則收藏室內多則移置遠處為便

一遇賊將臨城須先集各保甲長給與連坐信牌使之各保自行曉諭各甲自相糾察如有容留

奸細者一甲連坐軍法重罪不得與平時止坐  
值日者輕罪例論其寺觀菴院給與該住持僧  
道使各房互相糾察待賊一退即收信牌不准  
此例及今寇未臨城宜令長吳二縣佐貳官各  
一員先督刻小牌計在城甲數每甲一張印完  
以便臨時給發

一盤詰奸細之法須委官帶領知事人役在城門  
外弔橋邊陳侍兵衛逐一仔細認辨各色人并

檢驗物件每門用衛弁一員有精力教官一員  
省祭雜色官一員兼領其事城門之下又嚴以  
待之守門官員再行查驗遇警則閉今人聞警  
即將城門晝閉或止開一門或日開二門而詰  
奸又在城門之內但恃官廳為盤詰之所若有  
奸細假作避難之人一齊擁入又孰從而詰且  
辨之耶

一城門無先閉塞以示賊怯而使屬邑被殘城門



無用土塞止於門扇中當胸開鑿五孔以五弩  
手守之賊不敢近矣

一水門乃民間柴米所入所須甚急但要視勢緩  
急委官與陸門一體嚴加盤詰不致疎虞可矣  
一槩閉絕適以自困此守城者所深戒也

一城外沿濠攔馬牆不可以不堅築須高六七尺  
內多留穴空以便窺伺以放鳥銃每城一面另  
募敢死士百人各執鳥銃利器潛布在內賊夜

攻城必渡濠踰牆而入使內有備不必喧嚷俟  
半渡銃擊之近牆手刃之城上下俱不得傳呼  
叫喊使賊不知伏兵在內而輕犯馬牆有備城  
上自可無虞矣

一閒雜人等不得無故上城堞口窺視擾亂軍伍  
且防城外矢石誤中旁人趨避不便驚惑衆心  
倘有奸細亦難防閑相應嚴禁

一凡敵在城外不獨當為守禦具亦當為修城之

具如木石灰磚之類與匠人皆不可不備也

一城外有大樹宜伐之近城尤礙防禦預令盡行芟去乃為至計

一城下濠內週迴空地多有居民占造房屋賊若攻城必先渡濠頓住城足城足有屋賊可隱身城上矢石難施且賊登屋可以發火器矢石攻城前任巡按御史孫公下令焚燬實萬不得已也不二三年愚民貪昧又行蓋屋若姑息之是

將在城數十萬之命而為僥倖之圖也今後賊將入境務要盡行拆卸如不從者臨時照前院法處治然非寇患逼近亦不得輕議拆毀使民無所棲

一賊將臨城須在城外預結三四壘屯兵把守與城中為犄角勢至為上策若敵環而攻我曠日持久計內乏食則必佯退數舍至夜還襲之不可不知

一賊至城邊若向內射箭放銃城上不得喧嚷俟  
賊近城令慣熟鳥銃手及善射者乘便發銃放  
箭務要巧發奇中得斃賊寇一二人其餘自望  
風而退且更不知我兵伎倆虛實無得一槩亂  
發以窮矢藥若矢多射出恐其易盡宜乘賊敗  
後縋童子下城以一錢易一矢募其拾還復射  
賊不能困賊若發矢越城樓注城中二三百步  
此但嚇人不能及物也宜慰諭城上人不必驚

懼賊若叢射宜多用臥被縫綴於杖或板如門  
簾之狀以竿挑之連比遮城堞彼箭雖著不能  
透也我能自隙射之

一打牲船上弩矢百發百中此船吳淞江陽城湖  
陳湖太湖等水鄉多有之須著各圖報舉入城  
不得容隱其人官府照養兵口糧給與工食計  
名分派城上緊要去處有功仍加重賞

一寇若圍城必宜募勇敢兵士夤夜縋城襲擊其

營或夜舉銃砲使寇驚潰其圍自解若以長木連繩作梯百乘上城不必疑懼一梯止上一人我以一斧守之賊上輒斫或以巨石墜下雖送與百梯令其上堞亦不敢也若囊土束薪填塹登城者此須令鳥銃並發人不敢近

定夫役

器械附

一姑蘇城堞舊九千七百九十新增敵臺堞又一千有零每一城堞用一人守之通計城夫一萬

一千人派城夫照依先任溫公之法大戶五名  
中戶不過二名下戶用二人三人朋充一名實  
為情法兼盡今長吳二縣除仕宦舉監生員外  
通將居民合二萬二千人之數分作兩班城夫  
雖有兩班口糧止用一班上城之日第一班直  
一晝夜至次早第二班人夫更替及今寇未臨  
城先就居民近住塚處寫定班名於各城塚上  
如賊在百里外先用保長甲長到城看守不必



預令城夫登埤俾各在家生理俟賊近城五十里保長鳴金鼓集夫上城其法宜用五人為伍每五埤口為一伍置木牌一面上寫守埤五人性名常以一人挨次輪立埤口將身向外觀望四人食息便厠則五埤口常有一人看守至夜亦挨次每一人輪守一更凡城埤口必取大石塊磊成方五尺高稱之每一更夫各置小旗一面令其自執登而擊柝站立既高得以俯瞰五

堞口城下有無奸細其餘四人穩臥遇有賊警喚醒同伍四人執持灰瓶石塊器械攻打則名雖終夜之守實則一更之勞名雖五堞相去不踰數武必無誤事也不然天下無終夜不寐之人精神困倦賊至不能禦矣餘堞俱照此式行一城上守堞各兵夫勤惰不齊固當稽察但使人點名更更擾攘則守堞者不能安睡憊其精神非計之得也宜分信地如自某處起至某處

止用巡邏兵卒十名每更分遣二名不許叫喝  
搖打梆鈴止挑燈巡視若有輪守更夫睡熟不  
行瞭望者暗掣更旗明早稟治仍喚醒令其防  
守不得驚擾擅自責打賣法併究五堞之內燈  
火斷滅即記輪更之人治之巡邏週而復始

一設巡邏之役又恐疎虞每門用衛弁一員佐貳  
官一員給以更箭更牌令各備馬遇夜巡警如  
南門巡至東門時值二更沿城無警將一更箭

交與東門城樓上驗收東門官隨付二更牌與南門官為號彼此各收次早送總巡官處查考餘門各如之若巡警各官將箭牌私換不親巡更者查出以軍法重治其每夜巡警須先察巡邏十人為先次查各堞口偶有熟睡失於守瞭者許即責懲執其更旗次早連巡邏人一併送總巡官處究治巡警官止許巡視亦不得呼喝點名搖打梆鈴以驚擾守堞之人

一城上各敵樓每處宜派定舉人一人或監生一人各帶家丁生員二人不拘家丁有無專在上歇宿督視本處堞口城夫晝夜防守若各該地方有防守疎虞致賊寇攀援上城者坐名申呈憲院提問亦不得科擾保甲長人等

一用衛指揮六員每員派定一門白晝各行巡視以整齊保甲長散夫人等站立觀望及防不測之變其官生六人每人派定一門給與巡視虎

頭牌面上寫遇夜各行巡視信地站立人等至  
交界處方回循環不息官生每人給馬一匹

一各城樓及對城外衝要之處各置佛狼機一座  
隨用裝火器二人帶火藥一桶備急用其城樓  
下預貯合用火器鋒利器械弓矢及堅固防牌  
使賊寇臨城時隨取隨足官廳庫中貯放石灰  
油燭火藥等項備用若庫中封識不盡更用沿  
近居民空房一二間封鎖亦可須委官一員當

時看取給發

一保長每人青衣裝束各帶腰刀一把號旗一面  
其散夫各備長柄鎗刀一把又帶鐵錐一個或  
斧頭一把任從其便如缺一件即以軍法處治  
每五堞備明燈一碗燈架先置城堞外可照城  
足詳說見前其燈每一保長給與二三十碗每日著  
一縣佐次第分派本日一夜之燈與保長派好  
燭若干枝任其分給城夫以備一夜之用若保

長有弊許城夫口告罰燭一夜其合用煎油煎  
糞鍋竈等項每保長一名預給鐵鍋二隻行竈  
二隻水缸四隻水桶四隻酒瓶二百個插木二  
根備用如有緊急再行分派物料至於暑雨合  
備細密堅厚箬笠蓑衣每保長一名給與百副  
分散各城夫穿用遇夜合給草韉等項每保長  
一名給與草韉二十五條大小竹一百根蘆席  
一百領以作蓋棚歇息城夫之用



一守堞城夫每遇敵樓舉砲舉雙燈每一伍內人  
先輪第一堞者支一更餘俱安睡一更盡敵樓  
上吹長聲喇叭轉更第二堞者輪出守更守過  
者即睡但不許脫衣如此五更五輪輪完天明  
換班若遇夜間忽聽城樓放砲鳴鑼車起雙燈  
是有賊寇來攻城另照攻打令行凡堞夫不令  
堞下立至天明者所以休息人力務使精神有  
餘免致每到四更人倦失更被賊掩襲但又不

許乘機私歸家中安歇違者處以軍法同伍連坐既許輪睡仍不得交相言說恐說得疲倦及至輪該執更反值困睡違者一體治罪

一宜將各敵臺編以字號分以信地別以號旗金鼓響器之類日間則觀旗色夜間則聽號聲各將字號大書堞牆使各熟認如天字號敵臺用紅旗用鼓則大書日觀紅旗夜聽鼓聲八字於堞牆地字號敵臺用黃旗用鑼則大書日觀黃

旗夜聽鑼聲等字其餘各敵臺皆然賊日間犯  
天字號信堞城下該管臺上搖紅旗該堞口各  
暨紅旗夜間犯天字號信堞城下該管臺上起  
鼓聲該堞口亦擂鼓信守兵夫一齊戒嚴禦擊  
左右各遊兵齊赴應援其餘各臺堞兵夫非係  
信地者無得離伍致賊乘間攀越地字等號各  
敵臺倣此

一慮賊攻日久守兵疲倦賊或乘怠而入須於堞

外蓋出浮棚每扇濶三四尺環城架設其制用  
或木或竹每根比棚倍濶以一半橫出堞外一  
半斂入堞內其外閣浮棚棚上壓以磚石天晴  
加石灰數包於上其內用繩縛墜石虛懸若賊  
加梯棚上則棚軟不能勝梯磚石且墜擊城下  
若賊置梯棚下而上登其棚觸首移動而亂石  
又墜矣如欲再加嚴固宜於沿城堞上豎架奈  
何木其制豎立架木二根機關橫挑木各一根

上閣一木謂之奈何木木上錯綜釘以竹簽其木輕重與挑木相稱賊來攀援則其木自然下擊人不能攀駕又不能放脫敵至城下守堞兵夫輕動其木墜下又可擊之此棚木易於成造費又不多宜令長吳二縣動支公帑預為製辦一宜先示約凡遇夜間賊寇集衆攻城方許放火箭三枝再緊發銃三個緊要鳴鑼三通每門各另設遊兵五十人持利器鳥銃一面禦敵總管

另帶枝兵應援一門有警各門堅壁固守不得  
輕動以防賊寇聲東擊西之患尤禁塚兵驚擾  
離次至於疾風暴雨半夜黎明人倦易弛賊每  
乘間登城尤當嚴加申諭可也

求人才

一才識可備密謀者

鄉宦御史徐涵泉慎密有謀老成忠厚且留心  
時事百凡與之計議可以安邦而治民

鄉宦郭劔泉執事素知不煩更贅

吳縣生員金澄料敵料事多先見之明議守議  
攻有不窮之蘊藏器不露安貧無求可稱才品  
兼全之士

一才識可司戰守者

蘇州衛所鎮撫郭惟寅久歷戰陣有功兼有操  
守可托新委領本府水兵

蘇州衛百戶吳濬曾經戰陣有功兼有操守可

托新委把守劉家河若欲用之申請督撫取回

蘇州府學生員晉日亨武藝閑熟戰陣有勇近時崑山圍城百方攻擊而不陷日亨與有功焉

本府武舉顧澣深而善謀長於弓矢

太倉州武舉陳情曾歷軍門有志立功

崑山縣武舉郭龍韜曾經守禦該縣勇於戰陣臨難不苟

常熟縣武舉任賢銳於立功謹於制行



一才力敏捷可應急務者

監生徐玄素才兼文武曾經總兵俞大猷處贊  
畫效用

監生王子陽通曉武藝

崑山縣學生員龔良相見義勇為遇難不避議  
論聳拔嘗督都司梁鳳兵赴敵

太倉州生員俞允升博學多聞經歷軍情可充  
考索備究問

一才力精勤可司巡視者

蘇州衛指揮何萬鍾

蘇州衛指揮朱承勳

蘇州衛所鎮撫謝潮武進士出身

蘇州衛百戶蔣基武解元出身

舊任軍門把總郭儒曾於總督軍門立功凡本城內外壯勇及淘沙之徒俱經其揀選屬其統領乃豪傑之士也須駕馭而用之勿容生事可

以大得其力

武舉黃若曾

武舉葛惠

武舉劉傑

一年力强壯可備火患者

承差省祭等官一十二員擇精力强者用之

一才力明敏可任盤詰者

蘇州衛官六員府三學教官六員省祭等官六

員請於督撫選擇

一錄精於奇門遁甲翻擒倒將大六壬課者

生員彭宰

民陸三省

吳城兵辨

吳城兵勢大畧有四

一衛官負其世胄渺視文職武舉為書生議論全不入耳實則守城攻敵皆非所長若陳習之能諳武

藝然終不脫自用故吳城好漢與武生所領有名之兵不入其幕下此項官兵似宜留作上司調征聽用

一武舉與舉監生員習學武藝者自謂文武兼通渺視衛官擅立門戶其部下之兵惟就其素所用熟與衛官所統各不相關此一類似宜分作城中各門屯守之用

一吳城內外好漢有強力能舉幾百斤者有膽氣勇

猛赴鬪爭先者有素閑武藝嘗充教師者有當應捕慣緝事者分而言之則四等合而言之則皆上上兵也嘉靖三十三年此輩嘗應募因官府不分皂白雜以無用之民槩給口糧三分統領非人其心不甘而又日剋其銀三釐該吏給銀者又剋二釐實止得銀二分五釐遂懈弛退避窮民乞丐之徒營求領兵給銀之人分銀頂替其後代役者求換的名兵不堪用實此之由非吳城無足選也愚

聞其私語云打行人數雖多好漢無幾我輩若在  
官使一一能識認之一一能擒拏之何內變之足  
患又云官府要用我須識三件其一聽吾儕自相  
推擇稍不濟者不容廁於其間不煩官府費心人  
人精當其二每名須日給工食銀四分勿與他兵  
不堪者例待其三須得有力量的好施與豪俠不羈  
之人委其統領庶人人樂於效用無不上前若使  
派屬衛官與武生不願也此一枝似宜用為府縣

護衛親兵

一淘沙之徒以千餘計在城內者遠不如在城外之  
驍勇可用蓋城內淘沙之人不過街市與市河營  
生而已城外下塘山塘一帶出沒深濠與僱倩毛  
徐諸大家看護夜警俱是便捷健狠之徒遴其尤  
者豈止百餘人而已乎此輩可充偷營劫寨及探  
兵之用工食與好漢同

養兵議



來問海防銀若干養兵銀若干約够幾月支用切惟國  
初沿海地方設備倭塾堡哨船防禦等兵其費原算居  
折白銀內矣承平日久規制大壞定額居折白銀內者  
未嘗廢也邇者倭患有作當道以原銀資用不敷復於  
田賦上每已米一石加銀八分以六分為兵食之需是  
之謂養兵銀以二分為造船修塾堡等用是之謂海防  
銀噫吳賦至重數倍他郡又加增焉民力不堪甚矣愚  
按本府清理田糧錄除崇明外太倉長吳等七州縣實

徵造存平米

即已米也說見蘇松稅法

共二百二十八萬一十五石

七斗今據現在海防養兵之銀每石已米加銀八分之數共該銀一十八萬二千四百兩有奇以二六分分之除海防銀四萬五千六百兩外該養兵銀一十三萬六千八百兩有奇每兵日工食銀三分之一歲計之可以養兵一萬二千六百七十人又問餘有不敷作何處給即使奏留京庫料價等銀有何錢糧可留分派徽寧池太等府某處該派若干善哉乎問也夫蘇郡錢穀甲天下

乃朝廷根本重地命脈之所繫也倭寇大患豈宜獨以一郡支之朝廷設巡撫之初意正欲伸縮劑量權而通之與時宜焉耳若非奏留京庫錢糧與分派徽寧等府協辦蕞爾吳壤民力豈能堪乎京庫錢糧有二曰白銀曰金花銀白銀解京入太倉為邊儲之用急於燎眉工部料價如銀硃黃銅之類在往時為空閒在今日為大工急切之用茲二者雖欲奏留不可得也惟金花銀一項本府七州縣該銀二十萬五千六百五十三兩有奇

係貯內庫聽用頗在所緩可以奏留借用其半其應天徽寧等六府素不被兵理宜協辦請憲檄取丁田銀之類解院與奏留金花銀一併貯庫聽用實於養兵為有助顧愚又有說焉本地水兵陸兵有限以一郡之力豈不足養一郡之兵所患者客兵之無限焉耳與其借兵於他省也不如以其費而訓夫土著之民與其用土著之民之多也不如倍其工食募其名數而精選勤練期於可用

訓練精可以省兵  
省兵可以省食


但土著之民未易猝練則客

兵未可遽撤客兵未可遽撤則所以養客兵者其銀不容於不處矣如愚見宜分土兵客兵為二項本府養兵額銀專供本府水陸官兵之用約酌海口把港舟師海塘壑堡旱寨及內地聽征陸兵水兵與養兵銀一萬二千六百七十人之數相合否乎若兵浮於銀則減兵以就銀銀浮於兵則照銀而益兵其處海防之法也亦然若儘養兵之數而合用之兵猶寡儘海防之數而合用之費未敷則以本府空閒錢糧補之其客兵一節以往

迹視之大率調來雖多而供饋不專於一郡攻守不定於一方如福蒼船等兵吳淞江以南屬之松江福山港以西屬之常州款兵邳兵之類分撥早寨地界亦甚悉吾蘇未嘗盡客兵而養之也其兵數恐亦不過數千其工食銀似不過十餘萬而止耳若督撫衙門奏留金花銀與檄取各府丁田銀之類專供其費何客兵工食之足患乎

蘇州府備寇水陸路圖

江北菱角背



江南經畧

四十三

二卷上四十三





蘇州府備寇水陸路論

中吳澤國也四通五達賊舟無處不可衝入若自東海而來則嘉定太倉受之從吳淞江劉家河可抵郡城若自揚子江而來則常熟受之從福山港官塘可抵郡城若自松江而來則從長洲之陳湖可抵郡城若自嘉興而來則從吳江之平望可抵郡城或自平望之西而入太湖或自江陰錫山而入太湖則從吳縣之胥口五龍橋石湖可抵郡城崑山居府東腹裏本無江海之險然

嘉靖甲寅倭寇犯境崑城獨先受圍以其去郡不遠可作巢穴也崇明孤懸海中四面受敵蘇之屬邑無不當設險者詳著各圖說於後

蘇州府險要總論

或問蘇之險要有幾曰倭寇之犯郡城也水港浩繁陸路交錯不可勝紀而要其總要樞紐所當控扼者不過十  
四處而已請詳言之賊若自海口而入則嘉定之吳淞  
江黃窪港太倉之劉家河七丫口四者其險要也若自

大江而入則常熟之福山港許浦三丈浦三者其險要也此皆本府險要之在外境者也能守此七處不容賊舟輕入則一州六縣皆晏然無虞況府治乎但濱海不止於太倉嘉定二邑而已在南則嘉興之海鹽平湖在東南則松江之華亭上海皆是也江口亦不止於常熟而已在西北則常州之江陰武進鎮江之丹徒丹陽皆是也鎮江路遠且置勿論嘉松常三郡江海口岸賊一內犯則長驅至蘇蘇之所恃以禦之者不在於交界設

險乎此之謂腹內險要也若不能守而縱賊過界則海口江口所設之險均為無用與不設同故設險於外境固為制敵上游策之上也而腹內險要亦不可視為輕緩在南方則吳江之平望所以禦海鹽平湖之衝長洲之周莊所以禦華亭南路之衝在東南則長洲之陳湖所以禦華亭中路之衝崑山之磧澳安亭所以禦華亭上海之衝為途不同同於備海寇之深入也在北方則長洲之蠡口所以禦無錫間道之衝長洲之望亭所以

禦江陰南來之衝吳縣之太湖洞庭兩山所以禦江陰  
無錫武進寇舟逸入之衝為途不同同於備江寇之深  
入也總而計之外境之險要有七腹內之險要亦有七  
此十有四者蘇郡之安危所繫何者當設水兵何者當  
設陸兵何者當兼設水兵陸兵擇將選兵勿惜糧賞常  
以一枝當敵鄰枝應援振肅軍令蘇郡豈有不安者乎

蘇州府禦寇論

或問入寇之路其多若此而往年倭寇出沒止由吳江

崑山常熟無錫官塘而來餘皆捨而不由何也曰有說焉倭寇之所長者揮刀焉而已陸戰焉而已舟楫非其利也何也寇至海濱登岸焚劫其船盡棄於海擄民航以深入雖甚快利不過二櫓飛盪而已雖善操舟不過役使鄉民而已其篙櫓之多較之兵船不如也水戰之便較之兵船不如也火器之備較之兵船不如也藥箭之利較之兵船不如也人力應援之齊較之兵船不如也若浮泖湖而來我兵合而圍之夾而攻之衝而斷之

彼豈能當乎兵法曰以吾所長攻其所短寇至狡猾固  
默識乎此矣故必由官塘橋梁之處整隊而行相機而  
進隨處殺人以樹其威分投放火以張其勢此其衆可  
數而其形盡露矣兵法曰形人而我無形此在倭寇已  
先犯乎戒矣使當時主兵之人能以吾無形者而制之  
彼豈能一人逃乎奈何哨探之無聞設伏之不講疑兵  
援兵皆不之用衝鋒者無賞而退走者無罰分吾兵力  
虛備於無用之地而與賊戰者反鹵莽焉何怪乎寇之

僥倖而去也或曰吳地多田塍甚窄僅可容一二人當前持一二器接戰不能以衆進也如之何曰倭寇之來魚貫而行此在兵法謂之直陣本當為橫陣以應之但岸塍非曠地之比恐有不能拘者吾以一二人進彼亦以一二人進吾以一二器戰彼亦以一二器戰同此窄路彼何所多於吾乎彼若以選鋒當前吾亦以選鋒當前精選各兵之中豈無以一當百者若干人足充吾先鋒乎彼之人數有限而吾之人數且無限以吾無限之




人而分為數支孰為正兵更番抽代孰為奇兵截賊歸路孰為左翼孰為右翼或伏於邨林列火攻以待之或隔水而陣設機械以誘之晝則相持而不與戰夜則多方以撓其逸彼將前不得進後不得退饑不得食勞不得息不四五日而憔悴必矣吾因而擊之也何有噫此能將與良有司之作用苟無其人功不虛成

長吳二縣合併圖

東

二卷四十八



七

月


吳浦

長江口軍門

江南經畧

西

四十九



蘇州府

長蕩

陸墓

虎丘山

許墅關

渡僧橋

上津橋

下津橋

楓橋

射濟鋪

木瀆巡司

長洲縣

新教場

石皮橋

橫塘橋

跨塘橋

胥口

寶帶橋

彩雲橋

古塘

九龍山

石湖

洞庭西山

五龍橋

滄臺湖

楞伽山

吳山

洞庭東山

鮑魚口

橫漚巡司

大湖


下


上

左

右

吳縣境圖





### 吳縣境考

吳縣附府城古吳子國歷周八百餘年惟稱吳無分邑  
 秦為會稽郡置吳縣漢定會稽領縣二十四而吳為首  
 邑武帝平東越以其地來屬增縣二并前為二十六城  
 亦以吳為首順帝初詔分浙江以東為會稽郡還治山  
 陰浙江以西為吳郡治吳領城十三吳亦為首三國吳  
 寶鼎元年分吳郡會稽為吳興郡縣屬吳興晉太康四  
 年割縣地置海虞縣今常熟縣隋開皇間改郡為蘇州移治

橫山縣隨郡移唐武德九年仍復故治萬歲通天元年分置長洲縣於城心東西畫境而治吳得西焉開元四年陞吳為望縣梁開平三年又割縣地置吳江縣元元貞二年陞吳為上縣國朝吳元年在城四隅分隸兩縣而吳割西南西北二隅

東至長洲縣在城臥龍街分界一里西至常州府宜興縣界一百里南至本縣一都一十五里抵太湖北至長洲縣在城界二里東南至本縣靈巖鄉南接至

吳江縣界一十五里東北至長洲縣界二里西南至  
浙江湖州府長興縣界七十八里西北至長洲縣界  
一十一里



吳縣備寇水陸路圖

吳縣

東

三卷上五十一

渡僧橋

祖橋

石橋

橫海橋

珍珠橋

敵樓

保清司

捕金司

石湖

白洋灣

湖大


鮑魚口  
吳王賊自此二道進

七

工部運

三

丙





吳縣備寇水陸路考

東並長洲

西瀕太湖

其道有三由胥門歷橫塘跨塘木瀆而出乎胥  
口者其西路也由橫塘行春橋而出石湖者西  
南路也寇若自常州浮湖而來則從此二口而  
入也由盤門五龍橋出鮎魚口者其南路也寇  
若自湖州吳江浮湖而來則從此入也三者皆

間道也非正道也

南抵吳江

其道有二由五龍橋迤東古塘而行出吳江之  
三里橋者東南路也由鮎魚口出太湖收吳江  
之柳胥者南路也賊若為尹山官兵所梗方由  
此二路而來皆間道非正道也

北通無錫

其道一由閶門上下新橋而抵楓橋是也楓橋

接長洲之澣野澣野北行即無錫縣地方矣此  
路水陸皆通實西北要衝乃正道非間道也

按吳縣與長洲附郭雖同而形勝迥異吳縣之所  
分轄者西南二方也多山少田半為太湖若曾嘗  
登西山之巔而覽之龍脈自建康而來崇岡大峽  
不可勝紀絕無谿洞翁筍可以竄賊山險不足患  
也所患者惟太湖耳西望陽羨北跨毘陵南負烏  
程茫茫數百里水光接天七十二峯峙於其中若

盪若浮盜舟凌風駕濤齊噪競進難於控禦且洞庭兩山富饒之名虛播天下盜素染指備之不可不豫故吳縣之所當設險者有六曰胥口曰石湖曰五龍橋曰洞庭東山曰洞庭西山其一則內地之楓橋也詳見各圖說於後

胥口險要圖

東 胥門

北

南

此河通楓橋

彩雲橋

石灰橋

橫塘橋

此河通石湖

天平山

觀音山

靈巖山

木瀆鎮

跨塘橋

胥口營


西

太湖

胥口

江南經畧

五十五



胥口險要說

胥門石灰橋西九里為橫塘又九里為跨塘又九里為

木瀆鎮又九里為胥口胥口者胥門往太湖莫釐

即洞庭東

山包山

即洞庭西山

之渡口也太湖東壖兩山對峙南曰胥

山北曰香山胥口介於其中湖寇若從此入則或由木

瀆東行而犯胥門或由木瀆西北踰靈巖支硎而掠楓

橋犯閭門故吳縣之險太湖為最大湖設險胥口為最

往年倭船之犯洞庭往返俱在於此木瀆鎮巡司不能



禦也故自胥門迄於胥口設營者三一曰胥門營二曰東跨塘營三曰胥口營內外相維遠近互援三者廢其一不可也

石湖險要圖

東 胥門

北

西

南

此河通楓橋

石灰橋

胥門營

彩雲橋

橫塘橋

越城橋

井亭橋

廟橋

跨塘管

跨塘橋

楞伽山

行春橋

石湖

太湖口



石湖險要說

胥門石灰橋西行九里為橫塘橫塘西南三四里為楞  
伽山

俗呼上方山

山麓所匯白澗而連太湖者石湖也乃太


湖之委瀦也週圍二十有六里行春橋在焉北屬吳縣  
界南屬吳江縣界民廬四匝雜植花竹而湖居其中寇  
若進此則或由橫塘而犯胥門或沿楞伽一帶山外而  
掠溪上掠橫金掠下保或由橫塘彩雲橋之北而掠楓  
橋犯閶門故石湖守禦不可以已也



五龍橋險要圖

北

東



江南經畧

五十八

西

盤門

橋中

瀑城

吳門橋

仙人堂

五龍橋

鮎魚口

麴杖港

橋帶寶通河此

古塘

湖太

南

五龍橋險要說

盤門外一水洪濶而南行者謂之鱸塘其長約十里分  
二水口出太湖在東濶一百三十丈者曰鮎魚口在西  
濶八丈者曰麪杖港二口之外湖水渺茫直通湖常二  
郡難於控禦跨鱸塘者有五龍橋焉離盤門七里在塘  
半途東通寶帶橋西通跨塘乃郡南之關紐也設險於  
此則北可以屏翰盤門而新郭仙人堂胥涇諸近地亦  
不至罹屠戮之慘矣



楓橋險要圖





楓橋險要說

自閭門至楓橋將十里南北二岸居民櫛比而南岸尤  
盛凡四方難得之貨靡所不有過者爛然奪目楓橋尤  
為商舶淵藪上江諸郡及各省菽粟棉花大貿易咸聚  
焉南北往來停橈解維俱在於此盜賊奸細至難盤詰  
往年嘗建敵樓設團營於接官亭寒山寺遺址現存不  
可以不修舉雖然險要有重有輕楓橋雖不當江湖水  
口之衝而所關繫至重似宜設重兵以鎮之不當與婁

齊諸附郭例視而已何也天下財貨莫聚於蘇州蘇州財貨莫聚於閶門島寇垂涎往事可鑒若再犯乎此蘇州元氣竭矣楓橋北近射瀆長蕩南通鱸塘太湖寇之所熱中者城內十一而此地十九其來也必非輕舉我兵豈可草草以應之乎團長之力曾足以禦之乎

楓橋築堡論

或問南北二濠抵於楓橋築一大堡以保障之如揚州新舊二城可乎曰不可郡中諸大家之倉廩與客販囤

園棧房陳陳相因以百萬計胥在城外以水次便焉故也若另築堡則莫肯內遷而四十餘里之城人少食乏其誰與守甲寅之議所以尼而不行者職此故也或又謂堡既不可築也使賊匿於民居若何而殲之曰奚而不可方賊之未至也火攻以逆之設伏以待之或就於楓橋地方而為之陷窅如無情障漏澤園六國城之類以掩之或伺其去而邀之於要路擊其情歸皆必勝之道也用其一而賊驚潰用其二而賊半滅用其三而賊

無子遺若三者而皆莫之能焉可恥甚矣雖設險何益哉

洞庭東山險要圖

北

梁山哨

倭寇經由處所

嘶馬哨

毛園哨

峯圻哨

山東庭洞

長圻哨

西

東

北湖口

封山營

渡船營

東山巡司

渡水橋

南

江南經畧

六十三


長沙府

洞庭東山險要說

洞庭東山即莫釐山也相傳隋莫釐將軍居之一名胥母則謂子胥嘗迎母於此也太湖浩渺其東為山者十有七而莫釐最大週圍五十餘里地占三鄉國初原屬舟頭巡司因去西山遼絕相顧甚難成化間特創東山巡司以轄之居民稠密商賈為業重利而輕生一遇寇警合山之人齊奮而出不賴官兵自相抗禦現今設兵哨營寨者八在北曰嘶馬哨曰梁山哨在南曰渡船營

在東曰北湖口在西曰長圻寨在東北曰長圻哨在西  
北曰毛園哨在西南曰葑山營各統之以耆民團長選  
鄉兵而訓之府縣官間一親閱務期實用但水兵未經  
酌處似宜報湖船編甲長而以五桅盤箍船領之有事  
責其在湖與巡司一體巡哨庶幾郡城可以無西顧之  
憂矣

洞庭西山險要圖



北

陰山

華山

大勝寨

舟山寨

西

山西庭洞

東

元山寨

舟頭巡司

龜山寨

廟山寨

石公寨

移山

三山

決山

石山

南



洞庭西山險要說

洞庭西山乃包山之別名也

山川志包山以四面水包之或謂包公嘗居之真誥

云去洞庭見包公問動靜包公者句容鮑靚也

太湖中

峙之山在西四十有一而包山最大週圍一百三十里

舟頭巡司在焉管三鄉五都廬聚物產大畧與東山同

盜素難犯嘉靖甲寅倭寇登劫一鯨為團長徐术等所

截自黃麻門從漫山而下向空湖往常州境去一鯨為

者民周瓚等所逐至獨山轉戰三四十合往無錫境去

蓋山民重於保家而輕於用命沿習有如此者其在湖  
謀利諸船衝冒風濤視險如夷尤堪召用今所設者旱  
寨有六北曰大勝南曰石公東曰元山西曰舟山東南  
曰龜山西南曰廟山各領之以團長隊長朝夕訓練而  
水兵船尚為缺典似宜通行選練與東山水陸兵相為  
聲援湖中有警責令夾擊更與西北馬蹟諸山西南石  
湖諸山約為犄角無分秦越則盜必不敢窺太湖矣

吳縣險要總論

吳縣險要與長洲不同長洲乃賊之來路也吳縣乃賊之去路也何也倭舶從海而來泖澱吳淞婁江福山之類皆其所從來之路也皆長洲連界地方也太湖在吳縣之西倭寇來此不便往年出石湖出胥口皆滿載之後因憚東北方官兵阻截欲假太湖走吳江以出海乃去賊也夫其來既皆在於長洲也則長洲設險捍之宜也吳縣為賊去路則逐之出境已矣兵法曰歸師勿遏險要之設無乃為贅歟曰否所謂設險者團鄉兵於水

口兩岸拒賊之入非拒其出也況賊可以從此而出亦  
可以復從此而入方其出也謂之去路若回翔反顧即  
來路也往年倭舶一由胥口犯洞庭為吳江水兵所阻  
復還胥口從常熟而去一由石湖亦為吳江水兵所阻  
跪拜求還水兵貪餌縱出莫舍淩去可以驗矣方其去  
也吾兵嘗與之戰既犯兵志勿遏之戒及其復入不敢  
與戰而直縱之皆由當時主兵者昧於方畧故耳兵法  
曰擊其惰歸此之謂也設使賊出湖時督水兵者能尾

而擊之縱不全勝必求向前脫不敢復回矣水兵船者  
逐賊之正兵也在岸之兵不過慮賊登岸故設以待之  
耳豈可不用兵船追擊而但恃夫陸兵乎或引兵法窮  
寇勿追以辨水兵尾擊之謬噫是大不然窮寇者饑餓  
窮迫以命相搏者也出湖之寇乃飽其所欲舟自為計  
勢不相顧者也此在兵法急擊勿失之條何可謂勿追  
乎要之已上所謂皆就今日倭寇言耳太湖之險萬古  
不變倭患寧後能保無寇從西來者乎是今日倭賊之

去路乃異時他賊之來路也險要圖說其吳縣千百年兵防之定準乎

吳縣巡司

弓兵  
數附

木瀆巡司

在吳縣西南三十里木瀆鎮設弓兵四十名往來巡

邏

橫金巡司

在吳縣西南三十里橫金邨洪武三年建設弓兵四


十名往來巡邏

舟頭巡司

在吳縣西南八十五里洞庭西山設弓兵四十名往來巡邏

東山巡司

在洞庭東山國初原屬舟頭巡司成化中巡撫都御史王公恕奏置設弓兵四十名往來巡邏



江南經畧卷二上